


## ALAHADY faha-4 KAREMY - TAONA D2019



### « Ilay ity mandray ny mpanota sy miara-mihinana aminy » (Lk. 15: 2)

Ry Kristianina havana, izao no andro tsara sy androm-pahasoavana ka hibebahantsika mba hanatonantsika an'Andriamanitra ka, fotoana hiekentsika heloka ka havaozin'Andriamanitra ny fo amam-panahintsika dia lasa olombaovao isika, izany no andrandraintsika amin'ny Paka.

Vakiteny I : Jôh. 5, 9a. 10-12  
Tononkira : Sal. 33, 4-5. 6-7  
Vakiteny II : 2 Kor. 5, 17-21  
Evanjely : Lk. 15, 1-3. 11-32

Nobanjinintsika izany tamin'ny Alahady lasa teo raha nandinika ny niseho tamin'ny vahoakan'Israely, ny zavamitranga ireny tsy hoe Andriamanitra mahatonga ireny loza ireny fa fananarana ho antsika, hanampy antsika hiaiky fa ao amin'Andriamanitra irery ihany no tena hasambarana, Andriamanitra irery no loharanon'Aina.

Amin'izao Alahady faha efatra amin'ny Karemy izao, manambara fa efa akaiky tokoa ny Paka, I Jesoa nandalo tamin'ny ratsy indrindra dia ny fahafatesana nefa nitsangan-ko velona. Raha miara-maty aminy amin'ny fahotana isika dia hitsangana hiaraka aminy. Paka hitondra aim-baovao ka hanova ny fifandraisantsika samy antsika, ny fifandraisantsika amin'ny zava-boahary, ny fifandraisantsika amin'Andriamanitra. Ny fanoharana ataon'I Jesoa amintsika amin'ny Evanjely androany Lk 15, izay matetika fintinintsika amin'ny hoe tantanran'ny zaza mpandany. Ny tena ny tena lohateny marina anefa dia Andriamanitra tsy lany fitiava ka manambara fa Andriamanitra Ray be famindrampo, izany no tian' I Kristy ambara amintsika eto. Na manao akory na manao akory ny toetrantsika,

Andriamanitra tsy lany famindrampo, izany no Andriamanintsika, Ray be famindrampo. Raha manatona Azy isika dia Izy no mialoha làlana antsika mandrakariva. Izany no foto-pampianarana tian'ny Eglizy ho tsapantsika amin'izao Alahady faha-4 ny karemy izao.

Na inona ny toetrantsika, na manao akory ny toetrantsika dia vonona Andriamanitra handray antsika, handrontsaka ho antsika ny fahasoavany.

Ny evanjely androany dia mampibaribary tsara ny tena toetrantsika olombelona dia ny fandanianiam-poana sy ny avonavona, fiheverana mahavita tena.

*“Nisy lehilahy anankiray nanan-janaka mirahalaha, ka hoy ilay zandriny tamin-drainy: “Dada ô, omeo ahy ny anjara fananana tokony ho ahy”. Dia nozarainy tamin'izy roa lahy ny fananany. Nony afaka andro vitsivitsy, dia nangonin'ilay zandriny ny fananany rehetra ka lasa nankany an-tany lavitra izy, nandany ny fananany tamin'ny fitondran-tena ratsy. ”*

Tsy nitsahatra nandany ny fananany ilay faralahy. Isika olombelona dia tahaka azy koa satria matetika mandany ny fahasoavana omen'Andriamanitra antsika ary lanilanintsika amin'ny zavatra tsy misy antony. Manana ny toetran'ilay zanaka lahimatoa koa isika satria mifanaratsy sy mialona fa tsy mitady izay iombonana. *“Fa hoy ny navaliny an-drainy: “Indro efa ela no nanompoako anao, ary tsy mbola nandika ny didinao iray akory aho, nefa tsy mbola mba nomenao zanak'osy iray akory hifaliako amin'ny sakaizako; fa nony tonga kosa io zanakao io, izay avy nandany ny fanananao tamin'ny vehivavy janga, dia namonoanao zanak'omby matavy izy”*

Mananatra antsika Kristy amin'izao Alahady izao amin'ny alalan'ity fanoharana ity mba hiova isika satria samy toetrantsika olombelona ny toetran'ilay faralahy mpandany sy toetran'ilay lahy matoa tsy mitsahatra manaratsy ary mihevi-tena ho mahavita tena. Matetika isika mihevitra fa tsara ny ataontsika. Toetrantsika ireo rehetra voalaza ireo. Ireo ny fahotana manapotika ny fiainantsika araka ny voalazan'I Papa François tamin'ny hafatra amin'izao Karemy izao. Noho izany samy mila fibebahana tokoa ka tsara ho tsapantsika izany amin'izao Alahady faha-4' ny karemy izao. Raha tanterakantsika ny tena fibebahana marina dia faly tokoa Andriamanitra mandray antsika.

Ambaran'ny vakiteny voalohany izay misantatra sahady ny Paka, mananatra ny vahoaka I Josoe, ny amin'ny fomba fankalazana ny Paka. Izany koa isika efa niomana sahady na amin'ny litorjia izany, na amin'ny fontsika tsirairay avy. Tena mila fiomanana ny Paka. Ilay ambaran'I Jesoa amin'ny evanjely no lalana mankany amin'ny Paka izany hoe isika hiverina amin'Andriamanitra no tsara indrindra. Ilay zaza mpandany dia lany ny fananany rehetra ka lasa tsizarizary ny fiainany, potika tahaka izany koa isika lany ny fahasoavan'Andriamanitra amintsika ka potika. Ireny isika mitevy ala isika ireny, isika manimba ny zava-boahary dia manapotika, mandanindany ny harena amin'ny tsy misy dikany isika. Aoka isika hiaro ny tontolo iainantsika, hiezaka hamboly hazo, hitady fomba hanatsarana ny tontolom-piainantsika. Tsara ho fantantsika koa ny dikan'ny hoe

*“ kirario ny tongony, asio peratra ny tanany”* mba hiova ny fombantsika ka hiala amin'ireny fomba taloha ireny manapotika antsika sy fifandraisantsika amin'ny zavaboary, amin'ny tontolompiainantsika, amin'Andriamanitra Ray. Marina fa mahavelona ny teo aloha fa mila fomba famokarana bebe kokoa isika, izany ny atao hoe génération de bâtisseur. Raiso ny fampianarana ataon'ireo manam-pahaizana mba hamokatra bebe kokoa na lavanila, na kafe, na jirofo, na vary, raiso ny fampianarana fa izany no maha génération de bâtisseur antsika.

Havaozy ny tontolo iainantsika, aza manao tahaka ny lahy matoa isika ka mifanaratsy sy mihevitra ny mahavita tena samirery fa Andriamanitra be famindrampo, olo araike amintsika.

Aoka isika hampanjaka ny marina, tsy hialona, tsy hifamono amin'izay miova ho tsara ny fiainantsika. Raha te ho génération mpanorina tokoa isika dia aoka ho marina, hifanasoa, hifanatsara, hikatsaka mandrakariva ny soa iombonana.

Mananatra antsika koa i Md Paoly ao amin'ny vakiteny faharoa "mihavana re amin'Andriamanitra", miova tokoa ny fiainantsika raha mihavana amin'Andriamanitra isika, raha Andriamanitra no ataontsika eo anivon'ny fiainantsika, izany no atao hoe Paka. Raha tiantsika Ho Paka tokoa ny fiainantsika, aoka isika hametraka an'Andriamanitra eo anivon'ny fiainantsika.

Mihavana re amin'Andriamanitra fa izao no androm-pahasoavana.

Aoka isika hihavana amin'Andriamanitra ka ho zary zava-boahary vaovao ao amin'Andriamanitra, miova ny fifandraisantsika amin'ny zava-boahary, miova ny fifandraisantsika amin'Andriamanitra, olon'Andriamanitra isika ary mpandraharahan'Andriamanitra izahay hoy I Md Paoly, ka manao antso avo amintsika mba hihavana amin'Andriamanitra.

Ry Jesoa Tompo ô, izao tokoa ny androm-pahasoavana, nampibaribarinao fa Ray tsy lany famindrampo Andriamanitra, izahay mandanindany ny fahasoavana fa izy tsy lany famindrampo, miandry anay izy, mialoha lalana antsika izy. Enga anie hananaraotra izao fotoana izao izahay hanatona anao bebe kokoa ka hihavao tokoa ao aminao.

Ry Jesoa Tompo , ianao no mampahafantatra anay fa lalina tokoa ny fanehoan'Andriamanitra ny famindrampony ka ampio izahay hahatoky ny fitiavany sy ny famindrampony ka tsy hisalasala hanatona ny sakramentan'ny fampihavanana mba hihavao ny fiainay ka hahatonga anay ho Eglizy Olona Velona sy Eglizy Tranon'Andriamanitra hanjakan'ny rariny sy ny hitsiny, ka hitondra fiainambaovao, ho paka feno fiadanana ho anay izao paka homaninay izao. Amen

Mompera Arsevka Benjamin Ramaroson